

**Ingerlatseqatigiiffinnut inatsit allangortinneratigut takornarialerinikkut, aalisarnikkut, sanaartornikkut, ussassaarutilerinikkullu suliffeqarfiit nunatta avataaniit pigineqartut immikkut allattorsimaffikkut nalunaarsorneqarsinnaalernissaannut periarfissat pillugit Naalakkersuisut nalunaarusioqqullugit Inatsisartut aalajangiiffigisassaattut siunnersuut. Nalunaarusiaq UKA2024 nallertinnagu Inatsisartunut agguanneqassaaq.**  
(Inatsisartunut ilaasortaq Aqqalu C. Jerimiassen, Atassut)

### **Akissuteqaat**

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

### **Siullermeerneqarnera**

Siunnersuutip tungavilersorneqarnerani allassimavoq, aningaasat nunatsinni isertinneqarsimasut nunatsinnit aniaannanginnissaat siunnersuuteqartup kissaatigigaa. Tamanna annerusumik paasisaqarfigerusullugu siunnersuuteqartup kissaatigigaa, ajornangippat ingerlatseqatigiiffinnut inatsisip allangortinneqarneratigut, ingerlatseqatigiiffiit nunanit allaneersut Suliffeqarfinnik Qitiusumik Nalunaarsuiffimmi (CVR) immikkut nalunaarsorneqartalernissaannut periarfissat pillugit Naalakkersuisut nalunaarusiussasut. Taassumap kingorna suliffeqarfinnut nunanit allaneersunut allaanerusumik nutaamik akileraarusiisalernissami periarfissap, politikkikkut naliliiffigineqarnissaanut nalunaarusiaq atorpeqassaaq.

Siunnersuuteqartup kissaatigisaatut, ingerlatseqatigiiffinnik nunanit allaneersunik CVR-imit immikkut tiguisoqarnissaanik ullumikkut periarfissaqareerpoq. Taamaattumik nalunaarusiortoqarnissaa imaluunniit inatsimmik allanguisoqarnissaa pisariaqanngilaq. Suliffeqarfinnik nunanit allaneersunik immikkut ittumik tiguisoqarnissaa, Naalakkersuisunit aalajangiinnarneqarsinnaavoq. Suliffeqarfinnut nunanit allaneersunut immikkut ittumik akileraarusiisooqartassanersoq oqallisigissallugu pisariuvoq, tamannalu akileraarusiisarnerup aaqqissuuteqqinneqarnissaani eqqartorneqartariaqarluni. CVR-imi paasissutissanik tigusinikkuinnaq taamatut aalajangiisooqarsinnaanngilaq. Taamaattumik Naalakkersuisut siunnersuuteqartumut kaammattuutigaat, suliffeqarfinnik nunanit allaneersunik immikkut ittumik akileraarusiisarnissaaq pillugu apeqqut, inuussutissarsiutinut akileraarusiisarnerup aaqqissuuteqqinneqarnissaata isumaqatiginninniutigineqarnissaani qaqissagaa.

Naalakkersuisut isumaqarput, najukkami inuussutissarsiutillit illersorneqarnissaannut ullumikkut alloriaateqartoqareersoq. Aalisarnermi pingaarnarpaamut, tassalu raajarniarnermut najugaqavissut 100 %-imik piginnittuunissaannik piumasaqaateqarpugut, aalisarnernilu allani najugaqavissut 2/3-imik piginnittuunissaannik piumasaqaateqarluta. Suliali illaanni sukaterisoqarnissaa aamma pisariaqartinneqarpoq. Suliani arlalinni

nammineq inuussutissarsiutaatigut tamakkiingajattumik piginnaasaqarnerannut, taamaattumillu ingerlatseqatigiiffiit, sulisussallu avataaneersut pisariaqartinneqarnerinut atatillugu, sukaterisoqarnissaanik pisariaqartitsineq isigineqassaaq. Taamaattumik ingerlatseqatigiiffiit, sulisullu tikilluaqqullugit, aammali nammineq inuussutissarsiutitta imaluunniit sulisutta ajornerusumik atugassaqartinnatigit tassani oqimaaqatigiissitsinissaq pisariaqartinneqarpoq. Oqimaaqatigiissitsineq taanna qulakkeerneqartuassaaq, sulissutigineqartuarlunilu.

Suliffeqarfinnik nunanit allaneersunik immikkut ittumik tiguisoqarnissaa akornutissaqanngimmat Naalakkersuisut innersuussutigaat, siunnersuut itigartitsissutigineqassasoq.

Aalajangiiffigisassatut siunnersuut Inatsisartuni kajumittumik suliassanngorlugu matumuuna tunniuppara.